

Hier finden Sie alle WOCHENBLATT-Kolumnen aus dem Jahr 2009.

Die Kolumnen aus den Jahren 2007 und 2008 gibt es als Buch:

Schwöbel's Woche.

Kolumnen in Mannheimer Mundart.

verlag regionalkultur ISBN 3-89735-417-9

Ubstadt-Weiher – Heidelberg – Neustadt/Weinstraße - Basel 2009

Das Hohelied der Liebe

Hans-Peter Schwöbel

Entsinne Se sisch: Woihnachde war mol „das Fest der Liebe“? Ma kann's kaum glaawe, bei dem Geduudl un Gedees. Weltweit schoint ää Art ‚Fescht‘ alle onnare kabudd zu mache: ä chronisches Halloween. Zum Lache, wonn's nädd zum Groine wär. Do graust mir's vor Gemütlischkeit. Unna de traditionelle Feschde duud mas om meischde leed um die Woihnacht. Deshalb leg isch Ihne moi Iwwadrauchung vum 1. Korinther 13 unna de Chrischdboom. Als Erinnerung.

1. Wonn isch mit Mensche- un Engelszunge redde kännt un gewaldisch, wie de Barack Obama odda de Jesus vun Nazareth, dasses de Mensche kalt un heeß iwwa de Buggl laaft, un hedd kä liebwarmes Herz, wär isch än dopsender Gligga un ä schebberndi Bix.
2. Wonn isch alle Zeische on de Wond un om Himmel lese kännt, un s'Gligg un s'Uugligg vorraussaache un wisst alles un deed alles vaschdeh un hädd de rischdische Glaawe zum Berge versetze, un hedd kä liebwarmes Herz, donn wär isch än Honnebombel un Labbeduddl.
3. Un wonn isch alles, was isch habb un kann, de Arme gewwe deed, moi Lewe uffs Spiel setze, uff de Scheidahaufe gehe un hedd kä liebwarmes Herz, wär's fär die Katz.
4. Die Lieb is zart un geduldich. Sie is nädd eifersischdisch. Die Lieb will nädd herrsche un bloost sisch nädd uff.

5. Sie macht die Onnare näd runna, sie is näd egoisdich, sie schiebt näd glei än Hals un is kä beleidischdi Lewwaworscht. Sie weeiß näd alles bessa un hodd näd imma s'letschde Wort.
6. Sie iss näd schadefroh un ärgert nimmond. Uurescht duudare weh. Awwa ihr Schwester, die Wohret die hodd se gern.
7. Sie hält schwer was aus, schenkt Vertraue, schafft Zuvasischt, un draacht s'Schwere mit Kraft un Ausdauer.
8. Die Lieb heert niemols uff, während menschlichi Wissensschaft scheitert un unsa Schbrooche unnagehe wärre un unsa gewaldisches Wisse zommeschnortt.
9. Jetzt sehe ma bloß Fetzä vum Gonze un unsa Prognose stochern im Newwl un fladdern im Wind.
10. Wonn awwa alles is, wie's soi soll, is Schluss mit de Fetzä un ma wärre s'erschde mol rischdisch gonz.
11. Wie isch ä Kind war, haww isch gedenkt un geredd wie ä Kind, war gscheid, wie ä Kind. Wie isch groß worre bin, haww isch uffgheert, kinnisch zu soi. Un bin doch Kind gebliwwe.
12. Jetzt gugge ma in än vabrochene Schbiggl un heere ä dunkles Wort. Omme schääne Daach awwa sehe ma Gsischt in Gsischt, Aach in Aach. Heit vaschdeh isch bloß bröckelesweis. Awwa donn wärr isch alles vaschdehe, wie isch gonz un gar vaschdonne wärr.
13. Bis doohie hamma de Glaawe, die Hoffnung un die Lieb – die drei. Die Lieb awwa is die greescht Kraft unna dänne drei.

Isch wünsch alle WOCHENBLATT-Leser ä Liewesfescht un än guude Rutsch!

WOCHENBLATT Mannheim
24. Dezember 2009

Brotworscht om Dreckäma

Hans-Peter Schwöbel

Gott soi Donk misse Se die Kolumne nimma ausschneide, uffheewe, auswennisch lerne un alle zwee Woche on Monnema in de gonz Welt schigge. S'gibt „Schwöbel's Woche“ jetzt als Buch. Ä Woihnachtsgschenk, wo basst un hinnenooch nädde umgedauscht wärre muss, weil's sponnt on Bauch un Bobbes.

Känne Se sisch on moi Kolumne vum 13. Dezember 2007 entsinne? Genau, des war die mit de Gliehwoikärwe alias Woihnachtmarkt, wo's heeßt: „Uff de Gliehwoikärwe trifft ma die Leit zu Dausende. Letschhin haww isch om Wassatum in zäh Minudde zwonzisch Leit getroffe, mit dänne war isch nädde verwondt un nädde verschwägert, trotzdem hawwe ihr Knie genau in moi Kniekehle gebasst...“

Jetzt isses widda so weit: Gliehwoikärwe, „so weit das Auge reicht“ un de Rissl de Duft vun Brotwärscht, Gliehwoi un Waffeln aus de Luft pfligge kann, wie'n Elefond die Blädda vun de Bääm. Uff de Gliehwoikärwe siehsch: Mir Kurpälza hawwe Kuldur! Kaum hamma ä Brotworscht gekaafft, hamma a än Dreckäma gfunne, wo ma dro esse könne. Nädde wie monsche Auslännä, wo nädde so viel Kuldur hawwe wie mir. Die laafe rum un suche än Disch. Mir sin do onnascht: Gern steh ma zomme um Dreckäma un losse's uns schmegge! Familiär halt. Wie ischs erschde mol Mensche on Dreckäma habbe esse sehe, war mir klar, dass des än guda Platz is, fär dro zu esse. Weil, vum Dreckäma isses nädde weit bis direkt newa de Dreckäma, wo ma donn soi Sach hieschmeiße kann.

On dem Beispiel sieht ma: bloß's Volk is wirklich kreativ! Wäre Möwel-Macher druffkumme, Dreckäma als Disch zu benutze? Nix, des hawwe mir Monnema erfunde. Erscht hinnenooch hawwe Möwel-Designer Dreckäma als Möwel, wie soll isch saache, designed, gestyled. Monsche bauchisch, onnare zylindrisch. Außerum ä Thek, ä Schischt Sempff druff, dass ma nedde so hart liggt, un in de Midd ä großes Loch. Inzwische gibt's verschiedene Modelle, vun dem, wie soll ma saache, ä schäänes daitches Wort: Dreck-Table. S'gibt Dreck-Table mi'me Schlitz in de Midd. Ehrlich gsacht, die mit dem Loch finn isch bessä. Weil, beim Schlitz kummsch gud noi, awwa nimma gud raus mit de Worscht in de Hond.

Wonn isch in de Kurpalz unnawegs bin, in därre Stadt, in sellem Dorf, stehe Leit um Dreckäma un genieße mit volle Bagge. Brotworscht om Dreckäma - unsan Beitrag zum „kulinarischen Welterbe der Menschheit“. Uffbasse, des kännt de Ausschlaach gewwe bei unsara Bewerbung zur Kuldurhauptstadt!

Steht än Kurpälza om Dreckäma, vier Bescha Glihwoi im Kobb, die Gosch voll Weck un Worscht un sacht: „Irrsinn aaß Volk!“ Hä? „Wirrsinn, fass Volk!“ Hä? Jetz schluggt er den Brei aus Weck un Worscht nunna, dassa vaschdonne wärre kann: „Wir sind das Volk!“

WOCHENBLATT Mannheim
10. Dezember 2009

Schweine-Grrr...! **Hans-Peter Schwöbel**

Isch kann nimma! Kaum hodd ma die letschd Polle-Allergie-Attack schier s'Gsischt vum Kobb gerobbt, grigg isch schun widda was on misch: Isch hab fauschtgroße Pickel om Hals. Des is moi gonz nadierlisihi Reaktion uff des Wort „Schweinegrippe“. Wonn isch's noch äämol heer odda les, bresch isch zomme. Isch wer donn de Erschde, wo die Fama-Induschdrie zu Rescht saache kännt: „Die Schweinegrippe hat ihn dahin gerafft.“

Weil ma's grad vum Raffe hawwe. Ää Erklärung dodefier, dass ä Zimperliessche vun Gripp zur Pescht Anno Domini 2009/2010 uffgebrezelt wärrd, is, dass die Fama-Induschdrie die Kubbe vun Zeigefinger un Daume onnenonna reiwe will un zwar Stereo – beidhändisch. (Fama = 1. Gerücht 2. In der römischen Mythologie: Personifikation des Gerüchts als Dämon mit vielen Augen, Ohren und Zungen. Aus: Wahrig Fremdwörter-Lexikon).

Ä Zeitlong hosch määne känne, dass sich die Mensche nädd ins Boxhorn jage losse. Zu offekundisch war die Ähnlichkeit mit de Kampagne namens Vogelgrippe. Zu klar war zu erkenne, dass die Ongscht vor'mä vagleischweis bescheidene Risiko, miehsam uffgebaut wärre muss. Awwa die Fama-Spezialischde hawwe aa Fehler gemacht. Isch wanna misch, dass erfahre Panik-Macher, sich uff ä Wort wie „Schweinegrippe“ versteift hawwe. Womma die Leit so vaschrecke will, dass se händeringend noch de Impfung schreie, därrf ma nädd mit so ämme Wort kumme, schun

gar nadd in de Kurpalz. Wonn än Kurpälza was vun Schwoin heert, denkt er on Schnuut un Bagge, Schwoinerippsche un Schwardemaache, on Saumaache, Brotworscht un Blunz. Un s'Wassa laaft'm im Bloomaul zomme. Des hodd ä desinfizierendi Wirkung un macht jedi Spritz iwwaflissisch. Wonn Kurpälza, bsonders Monnema, vaschregge willsch, musch gonz onnasch die Sau rauslosse. „Ratten-Grippe“ deed rischdisch Ongscht mache odda „Russengrippe“. Do deede raaweschwarze Schadde iwwa unsa sunnische Kurpälza Seele ziehe. Än junga Monn hodd vorgschlaache: „Schwaben-Grippe“. Des wer in Baden-Württemberg die bescht Lösung. Die Alemonne un die Kurpälzer deede Panik grigge un Schlonge stehe beim Impfe un die Schwoowe aa, weil die jo nadd wisse, ob se Objekt odda Subjekt vun de „Schwabengrippe“ sin. Wonn die Fama-Induschdrie än begabte Panikmacher sucht, kännt isch die Verbindung zu dem junge Monn herstelle.

Komma als Nicht-Medizina zu dem Thäma was saache? Ma muss sogar. Weil viel Medizina ääns nadd vaschdehe (wolle, känne?): wonn ä dunkli Fama unna die Leit gebloose wärrd, geht's wänischa um Volxxundheit, wie um Medie, Macht, Monede, also die Fortsetzung der Wirtschaftskrimi-, äh –krise mit onnare Middl. Un s'schoint jo doch widda mol zu klappe.

WOCHENBLATT Mannheim
26. November 2009

Meeschda im Quadrat **Hans-Peter Schwöbel**

Jedes Jahr finne Meeschdaschafde statt, wo vun de Öffentlichkeit kaum beacht wärre, awwa viel wischdischa sin wie sämtliche Weltmeeschdaschafde im Sport: Junge Hondwerkerinne un Hondwerker mache ä spezielli Ausbildung in ihrem Fach. Wonn se die Prüfung beschdonne hawwe, sin se Meeschda. Om Somsdaach hawwe 577 Jungmeeschdarinne un Jungmeeschda vun de Handwerkskammer Mannheim Rhein-Neckar-Odenwald uff ännare schääne, guud organisierte Verooschdaldung im Rosegarde ihr Meeschdaschaft gfeiert. De grad widda gewählte Präsident vun de Hondwerkskomma, Walter Tschischka, hodd ä gscheidi Redd ghalde. Kompliment!

Uff so Leit käna ma stolz soi. Hondwerker, wo ihr Arweit guud mache, ghere zu de wischdigschde Wertschöpfer un Kuldurträger in unsara Gsellschaft. Nadd die Seefeblooseschbegulonde on de Börse sin die Ökonome, sondern unsa Hondwerker, weil

se bleibende Werte schaffe. Nädd eitle Entertainer, Comedians un Witzbolde sin die Kuldurträger, sondern die Hondwerker, weil se Eigeschafde un Fähischkeide uffbaue un weidergewwe, wo grundlegend sin fär's Funktioniere vun Gsellschaft. Ohne weit-sischdische un qualifizierde Hondwerker känna ma die ökologisch un die Finonzkris nädd iwwawinde. Hondwerker leischde än Beidraach zur Materie- un Energieeffizienz. Sie sin Träger vun Werkstoff- und Werkzeugbewusstsoi – Basis vun jedare Hochkuldur. Sie endwickle Oistellunge un Verhaldensmeeglichkeide, uff die mir alle oogewiese sin. Die Hondwerker sin die wohre Kreative im Alldaach.

Moi Fraa un isch hawwe in de letschde Monade unsa Haus renoviere losse vum Dach bis in de Kella un Gadde. Ma hawwe die verschiedenschde Hondwerker im Haus ghabt un guude Erfahrungs gemacht. Die Mensche, wo uns ihr Könnne zur Verfügung gstellt hawwe, kann isch so beschreiw: zuvalässisch, pünktlich, fürsorglich, nädd eitl, sauwa, exakt, erfahre, kreativ. Sie hawwe insofern än Mehrwert gschaffe, als die Wertsteigerung vun unsam Haus höher is, wie die Reschnunge, wo ma de Hondwerker bezahle misse. Onnasch ausgedriggt: Die Renovierung hodd ä paar Monat gedauert, vabessad awwa unsa Wohnqualided fär viele Johre. So soll's soi. Des vaschdeht ma unna ‚Nachhaltigkeit‘ un unna Ökonomie. Wer ebbes Wischdisches, was kabudd gonge odda vaschlisse is, widda in Ordnung bringe kann, odda ebbes Nützlisches in die Welt setzt, was es vorher so nädd gewwe hodd, des is än Ökonom. So jemond vadiant unsa Achdung un hodd des Rescht, sisich soi Fähischkeide un soi Arweid ordentlich bezahle zu losse.

Isch wünsch de junge Kurpälza Hondwerksmeeschdarinne un -meeschda alles Guude, Xundheit, Luscht om Leewe un mehr Färz im Kobb, wie Bimbess im Beitel...

WOCHENBLATT Mannheim
12. November 2009

Lese! Lese! Lese! **Hans-Peter Schwöbel**

„Bücher lesen ist vonnöten, soll euch nicht die Dummheit töten:

Wer nicht gerne Bücher liest, ist für mich ein blödes Biest!

Bücher lesen, liebe Leute, nicht erst morgen, sondern heute!

Heute gilt's den Kopf zu füllen, dass nicht laut vor Lachen brüllen

alle Affen hier im Zoo über euren Kopf voll Stroh!

Stroh soll raus und Wissen rein, das gilt nicht für euch allein,
sondern klar für jedermann, der das Alphabet schon kann.

Ohne Bücher seid ihr Tröpfe, sogar Holz- und Wasserköpfe!

Des is'n Auszug aus'me Kinnagedischt vum Schriftsteller Günter Kunert. Rescht hod-da! Bloß deed isch zum Wisse noch s'Denke nämme, die Phondasie un die Luscht. Lese is ä Denk, Phondasie- un Luschterlebnis! Do wärre Gliggshormone ausgschitt, wie beim Schmuse, Fußball schbiele odda bei Wonderunge im Odewald. Un isch deed Köbb näd fülle, sondan akdiviere. Beim Lese wärre Bilder näd färdisch serviert, wie beim Film, sondan vum Leser selwa im Kobb gebildet. Bildung!

Dieses Daache hodd ä Studie der ‚Stiftung Lesen‘ bschädischt: „Lesen kompensiert soziale Nachteile.“ Im Bericht heißt's: „Vor allem Kinder aus sozial schwächeren Schichten können vom Lesen stark profitieren. Fast die Hälfte der Kinder, die gerne lesen und aus bildungsarmen Familien stammen, gaben an, der Unterricht in allen Fächern sei für sie kein Problem. Von den Kindern aus höheren Schichten sagten das nur 39 Prozent. Die Autoren der Studie ziehen daraus den Schluss, dass gerade bei Kindern aus schwierigeren Verhältnissen durch Lesen Selbstbewusstsein entstehe. Lesen ist wie kein anderes Mittel geeignet, Nachteile von Kindern aus bildungsärmeren Schichten wettzumachen. Es sprengt den Teufelskreis von innen, dass sich Bildungsarmut vererbt. Jeweils deutlich mehr als 90 Prozent der Befragten gaben an, dass Lesen den Wortschatz, die Allgemeinbildung und die Phantasie ihrer Kinder fördern kann. 84 Prozent sagten, ihnen sei wichtig, dass ihr Kind Bücher lese. Bei einer Vorgängeruntersuchung aus dem Jahr 1988 hatten dies nur 55 Prozent angegeben. Allerdings herrscht bei jungen Eltern Skepsis: Nur 42 Prozent der Eltern, die jünger sind als 30, glauben, dass sie das Leseverhalten ihrer Kinder beeinflussen könnten.“ Vielleicht draue junge Eldan sich heit generell nimma zu, ihr Kinna zu erziehe, weil se sich ohnmäschdisch fühle gegeniwwa de mediale Verführer und Verzieher. Sie sin aa machtlos, so long se kän Widerschdond leischde gege die, wo ihr Kinna noch ihre Geld- un Machtindresse forme wolle. Lese kännt ään Beidraach dezu leischde, dass Junge un Alde lerne, selbschdändisch zu denke, zu fühle, sich die Welt vorzustellen, un zu erfahre, wer sie sin.

Än Sege fär Seggene Hans-Peter Schwöbel

Isch muss zugewwe, dass isch aa moi Vorurdeile habb. Moi Lewe long habb isch ma die Hotzewälder zwische St. Blasien im Norde un Bad Säckingen on de Schweizer Grenz im Siede klää un worzlich vorgestellt. Schuld is än Klassekamerad, wo vor Johrzähnde immä Uffsatz gschriwwe hodd: „Im Hotzenwald lebt ein Menschenschlag von kleinem, knorrigem Wuchs.“ Weil die Klass gelacht hodd un de Lehrer gfroocht hodd, wo er den Satz her hodd, hodda om näggschde Daach ä Buch mitgebracht, wo des wörtlich drin gschdonne war. Seither haww isch ma die Hotze als ä Mischung aus Waldmensch (malayisch: Urang Utan) un Homo erectus (des iwwasetz isch lie-wa nädd...) vorgschdellt.

Jetzt lebt seit Johre in Seggene än Riesehotz, wo, wenn die Sunn dief steht, zäh Kurpälzer in de Schadde stelle kann. Er schwetzt so ä schäänes Alemonnisch: De Andreas Hänssler, die leibhafdisch Verkärwerung vun soim Vornome (Andreas, griechisch = der Mannhafte) - ä Bild vummä Monn. Un widda mol muss isch moi Weltbild renoviere, wie wenn isch nädd genug mit de Renovierung vun moim Haus zu duu hädd!

De Andreas Hänssler hodd ä Firma, wo Dischdunge herstellt. Unna onnarem Dischdungsring in alle Greeße, wo ma aa im Schdrooßeverkehr ämme Konkurrent um de erschde Platz on de rode Ampl zeige kann, ohne ä Beleidigungsklag zu riskiere. Er, soi Fraa Regina (= die Königin), aa so ä Großi, Gutaussehendi, un ihr gonzi Familie, engagiere sich fär Seggene. Newa onnare Akdividäde, z. B. in Varoine, hawwe se de Badische Hof in de Seggema Hauptschdrooß widda zum Leewe erweckt. S'Palü im Jugendstil als Verooschdaldungsort un Klääkunschtbiehn gibt's schun seit ä paar Johr. Isch kenn wänisch Uffdrittsplätz in de Kurpalz, wo so schää sin.

Jetzt isses gonze Ensemble färdisch worre: Palü, Gewölwekeller, Vinothek mit Bar un ä schääni Wärschaft, wo ma freundlich bedient wärrd un guud esse kann. Om Eröffnungsoowend hamma sogar Auschdern (ohne Bobbo!) gschlürft. De Badische Hof is widda ä Schmuckstick fär Seggene, Monnem un die gonz Kurpalz.

De Hänsslers un Mitstreiter merkt ma oo, dass nädd Asche ziehe wolle, sondern was schaffe, was ihne Freed macht, de Gemoinschaft nitzt un Bschedond hodd, frei

noch der Hymne: „Auferstanden aus Ruinen und der Zukunft zugewandt, lass uns dir zum Guten dienen, Seggene, om Neggaschdrond!“ Jetz iwwaleege Se, wo Se die Hymne schun ämol gheert hawwe, stimmts?

Nadierlich braucht ma fär so Projekte aa Geld. Awwa s'Geld is Mittel zum Zweck un kä Droge. Bloß so kann de Karre aus'm Dreck gezooche wärre, in den er vun Seefebloose-Schbegulonde un Geldsucht noigfahre worre is. Gliggwunsch un Kompliment noch Seggene!

WOCHENBLATT Mannheim
15. Oktober 2009

Vergiss mein nicht **Hans-Peter Schwöbel**

Vum 14. bis 25. Sebdemba is unna dem Moddo „Vergiss mein nicht“ in Monnem die „Aktionskampagne für ein demenzfreundliches Mannheim“ geloffe mit iwwa hunnad Aktione un viele Mensche, wo mitgemacht hawwe: Informationsverooschdaldunge, Diskussione, Kunscht, Donze (Beispiel: än Sitzdonz in de Schdrooßbohne), Filme, Theater, workshops, Ausstellunge, Besischdischunge, Musik, kreatives Gschdalde, un so weida. Donk un Kompliment on de Walter Werner un soi Mitstreiter, wo die Kampagne organisiert hawwe, un on alle, wo zum Erfolg beigedraache hawwe. Die Grundlag war ä gudi Selbschtorganisation un domit ä Stück Basisdemokratie. Die Dorothee Kremer hodd in ihrem „Monnema Demenz-Blues“ des schwer Vorstellbare, vorstellbar gemacht:

Ich steh an einer Kreuzung,
ich kann nicht vor und nicht zurück,
ich sehe viele Wege,
wohin ich gehen soll, weiß ich nicht.

Ich seh die Wolken ziehen
am Himmel über mir,
wie sie sich schraubend drehen,
so dreht es sich in mir.

Autos bleiben stehen

und fahren wieder an,
Bilder kommen und gehen,
Gedanken dann und wann.

Mir wird ganz schwach im Herzen
und Bilder flackern auf,
das ist nicht meine Straße
und das dort nicht mein Haus.
War es denn weiß gestrichen,
oder war's doch eher grau?

Konnt ich von meinem Fenster aus
auf eine Weise schaun?

War ich allein, wie heute,
oder lebte ich zu zweit?
War'n Kinder da, ein Ehemann
- erloschen ist die Zeit.

In meinen Taschen grab ich
nach meiner Identität,
mein Name, meine Straße,
mein Haus, all dies ist weg.

Ich stehe ohne Mantel
im Straßenlärm der Stadt,
hab Angst vor dem Vergessen,
das mich ergriffen hat.

Ich lenke meine Schritte
dort hin zu einem Baum,
setz mich in seinen Schatten
und höre auf zu schaun.

Ich höre auf zu fragen
 und warte einfach ab,
 dass mich hier einer wegholt,
 der mich verloren hat.

In meinen Taschen grab ich
 nach meiner Identität,
 mein Name, meine Straße,
 mein Haus, all dies ist weg.

Ich stehe ohne Mantel
 im Straßenlärm der Stadt,
 hab Angst vor dem Vergessen,
 das Euch ergriffen hat.

S'heesst, dasses in Monemm acht- bis zähdausend Demenzkronke gibt, Tendenz steigend (wie in alle Induschrielända). Demenz, wie alle komplexe Kronkheide, kann viele Ursache hawwe. Monsche komma vorbeuge un heile. Bei viele onnare geht des awwa nädd. Demenz komma nädd ääfach aus de Welt schaffe. Ma misse lerne, mit zu leewe. Womma's rischdisch vaschdehe, könne vun de Demenz positive Impulse fär die Entwicklung vun de Gsellschaft ausgehe. Vun unsare Verletzlichkeide un Schwäsche gehe seit jeher die stärkschde Impulse fär kulturelli Entwicklunge aus. Wie Susanna Martinez sacht: „Wir Menschen sind Bäume. Wir bedürfen starker Einschnitte. Nur so werden wir veredelt.“

WOCHENBLATT Mannheim
 01. Oktober 2009

Meinungs-Fischer **Hans-Peter Schwöbel**

Om 27. Sebdemba is Wahl zum Bundesdaach. Hoch-Saison fä Meinungs-Fischer: Sanft rammt das meinungs-fischer-institut.de dem Bürger das Polit-Thermometer unter die Zunge. Genau dort, wo die gefühlten Temperaturen am höchsten sind, drehen sie ihr Instrument, lesen die Werte ab und korrigieren sie dann; denn die Meinungs-Fischer kennen das Klima im Zentrum der Erregung besser als der Fiebernde

selbst: „Wenn jedoch am nächsten Sonntag wirklich Wahl wäre, würden längerfristige Überzeugungen und taktische Überlegungen das Wahlverhalten stärker beeinflussen, als es in den augenblicklichen Stimmungen zum Ausdruck kommt.“ Mancher am Haken der Meinungs-Fischer wähnt, beim Meinungsfischen ginge es um Politiker. Tatsächlich geht es aber um ihn, den Geangelteten. Seine Ängste, Hoffnungen und Zuschreibungen werden von den Meinungs-Fischern an Land gezogen.

Wie soll's auch anders sein. Wenn die Gefischten es nur wüssten. Sie glauben über Politik und Politiker etwas zu sagen und geben doch nur Auskunft über sich selbst. Das lässt sich an den Eigenschaften Sympathie und Kompetenz zeigen. Sympathie ist ein gefühlter Wert (weicher Persönlichkeitsfaktor). Geht es aber um Zuschreibung von Kompetenz, wähnt der Ins-Netz-Gegangene womöglich, so etwas wie objektives Wissen von sich zu geben. Der Meinungs-Fischer aber weiß, auch zugeschriebene Kompetenz ist ein gefühlter Wert, der wenig über den Politiker, aber viel über den Bürger aussagt.

Viele können sich nicht vorstellen, dass man sich systematisch einen Gebrauch von Gestik und Mimik aneignen kann, mit deren Hilfe man den Anschein von Kompetenz zu erwecken vermag. PR-Berater empfehlen: „Hüten Sie sich, handfeste Kompetenzen zu entwickeln. Wer etwas kann, endet als Wasserträger jener, die sich gar nicht erst damit aufhalten, etwas können zu sollen, während sie doch nur etwas werden wollen. Wenn Sie Karriere machen wollen, müssen Sie lernen, eine Miene aufzusetzen, die kompetent wirkt! Sie müssen lernen, kompetent zu gucken!“ Der Schein bestimmt das Bewusstsein.

So weit ä klääni Satire vun mir zum Thäma Dämonskopie. Onschunschnd saach isch: Wähle gehe! Wer in Daitschlond, nooch Nazi-Diktatur un DDR, sacht, wähle bringt nix, redd dumm Zeig. Nadierlich därrf ma nädd erwarde, dass ä Kreizl om Wahldaach, die Welt vaännad (meeglischt zu moine Gunschde...). Es is ään wischdischa Beidraach zur Demokradie unna onnare.

Un schunsch? Die sogenonnde Kriegsverräter, die, wo versucht hawwe, den kriminelle Krieg vun de Nazis nädd mitzumache, sin vum Bundesdaach rehabilitiert worre. Ä Schond, wie long's gedauert hodd un än Sege fär unsa Lond, dasses endlich gemacht worre is!

Un s'Leewe duud schweewe **Hans-Peter Schwöbel**

Summzeit – un s'Leewe duud schweewe,
Fisch donze silwern im Negga un Rhoi,
die Spatze Schneege Feige un die Meedsche duun singe,
un im Wingad reift ruisch än goldischer Woi...

Hea, hawwe Se se noch im Ohr, im Blut, unna de Haut, die Ella Fitzgerald un ihr gewaldischi Stimm in "Porgy & Bess" (George und Ira Gershwin):

Summertime and the livin is easy,
Fish are jumpin and the cotton is high.
Oh yo daddy's rich an yo ma is good lookin
So hush, little baby, don't you cry.

One of these mornin's,
Yo gonna rise up singin
Then you'll spread yo wings
An you'll take to the sky.

But till that mornin,
There's ain't nothin can harm you
With your Daddy an Mummy
Standin by.

Des schwarze Amerigonisch klingt wie unsa schääni Muddaschbrooch: volle, offene Vokale, än Rhythmus, wo grouved, die Schbroochmelodie, die Stimmung: romon-disch un ironisch, melancholisch un oighillt in ä leises Lache. Des konnsch nädd heere, schwetze, drääme odda singe, ohne innerlich mim Bobbes zu waggel.

So komma in ä paar Zeile s'Paradies ruffbeschwöre: Summa, Sunn, Süde: quetschebloo, mirabelle-gelb, mango-orange un summaflieder-violett. De speede Summa,

wonn de Auguscht safdisch in de Sebdember iwwalaaft, kummt bei uns om Rhoi dem Droom näher, wie im Juni un Juli. De Morgen is frisch un kiehl un middaachs nemmt uns die Sunn in de Arm bis oowends un legt uns donn in ä kiehli Nacht. Was än härrlicher Summa Desjohr, wo's so viel geregnt hodd, dass die grie Kurpalz so rischdisch basst zum blooe Himmel. Nädd schlescht, dass die Summa-Ferie in Baden-Württemberg so schbeed ligge.

Mir Daitsche sin des Volk mit'm Süd-Sähnsuchts-Gen. Wie unsa Vorfahre noch dursch die dunkle Wälder in Nord-, Ost- un Middleuropa gezooche sin, hawwe se ihr großi Sähnsucht entwiggt: Sunn, Schdrond, Palme, Toscana. Uffm Weg noch Süde hawwe se donn aus Versehe Rom ruiniert, wahrschoinlich weil die Rämer nädd schnell genug gsacht hawwe, wo de Schdrond liggt un wo's die billigscht Pizza gibt.

Iwwa die Johrhunnade is die Sähnsucht noch Süde so stark in uns worre, dass de Süde uns jetz erhört hodd un zu uns kummt. So erklär isch ma de Klimawondl un Lampedusa...

Awwa isch will Sie jetz nädd draurisch mache un gebb Ihne liewa noch ä Gedischt mit in in den blooe, schbeede Summer:

Am Ostufer der Abendröte

Ich gleite in eine Stadt voller Süden,
lande weich.

Die Sterne duften nach Mango,
unter der Haut trage ich ihr Aroma ins Haus.

Für Sekunden weiß ich etwas vom ewigen Leben,
ach, für Sekunden...

WOCHENBLATT Mannheim
03. September 2009

Gelobtes Land **Hans-Peter Schwöbel**

In der Kurpalz, wo Jordan und Rhein zusammenfließen, gibt es einen Baum, der in besonders wohlschmeckender Weise die Bibel und das Heilige Land mit unserer schönen Heimat am Rhein verbindet. Neben Palme, Weinstock, Ölbaum und

Dornbusch gehört der Feigenbaum zu den besonders bedeutungsvollen Pflanzen der Bibel, die zu tiefgründigen Gleichnissen herangezogen werden:

Beim Propheten Hosea finden wir die Liebeserklärung Gottes an sein Volk: „Wie man Trauben findet in der Wüste, so fand ich Israel; wie die erste Frucht am jungen Feigenbaum, so sah ich Eure Väter.“ (Hosea 9,10) Trauben in der Wüste - das gleicht einem Wunder. Kann man jemandem inniger sagen, dass man ihn liebt?

Im Buche Richter finden wir die Jotam-Fabel, in der die Bäume sich treffen, um einen König zu wählen. Sie tragen auch dem Feigenbaum die Macht an: „Komm, sei Du unser König! Der Feigenbaum sagte zu ihnen: Soll ich meine Süßigkeit aufgeben und meine guten Früchte und hingehen, um über den Bäumen zu schwanken?“ (Richter 9, 11) Nachdem die Früchte tragenden Bäume allesamt abgelehnt hatten, sich mit etwas so schnödem wie Macht und Herrschaft zu beflecken, blieb nur der Dornstrauch als Herrscher übrig. Der würde herrschen mit seinen Mitteln und alle unter seine Herrschaft beugen.

Iwwa die Fabel solde ma nochdenke, wonn uns die Politik zum Hals raus hängt.

Im Matthäus-Evangelium leuchtet eine Weisheit, die zum geflügelten Wort wurde: „An ihren Früchten sollt ihr sie erkennen. Erntet man etwa von Dornen Trauben oder von Disteln Feigen?“ (Matthäus 7, 16) Die Früchte sind es, nicht Worte oder hehre Absichten, die zeigen, wen oder was wir vor uns haben, und wer wir sind.

Bei Ausgrabungen wurden Reste von Feigen aus der Zeit 5000 vor Christus gefunden. Auch am Rhein kommt die Feige bereits seit Jahrhunderten vor. Während in der kleinasiatischen Heimat der Feige die Bestäubung durch Insekten erfolgt, bedarf die Pfälzer Fruchtfeige der Bestäubung nicht. Sie ist jungfernfrüchtig. Damit dürfte eine alte Streitfrage im Christentum geklärt sein. Was bei der Pfälzer Fruchtfeige alljährliches Wunder ist, sollte beim Menschen, der Mensch einmal in der Geschichte auch möglich gewesen sein... Im Streit zwischen Heilskundigen (Theologen) und Heilkundigen (Medizinern) gibt der Baumkundige (Pomologe) die Antwort...

Kurpalz – gelobtes Lond

Kaum is die letscht Kärsch uff de Zung explodiert
 Un hodd uns än Hochgenuss serviert,
 Duun on de Bääm schun gewaldisch schwelle
 Die Feige un Quetsche un Mirabelle.
 Sie schenke uns unsan neggschde Genuss,
 Frisch vom Boom, odda gekocht als Mus,
 Un neewe droo uffm Walnussboom
 Reift uns schun widda än Goschedroom...

WOCHENBLATT Mannheim
 20. August 2009

Die Unsichtbar-Macher Hans-Peter Schwöbel

Wonn Bääm schdärwe misse, setze se Ongschtbliehde (Angstblüten). S'heest, aus Ongscht vorm Schdärwe bliehe die Bääm noch ämol stark, viel stärker wie ohne des Wisse vum nahe Dood. Isch glaab awwa, „Angstblüte“ is ä arg menschlichi Vorstellung. Vielleischt isses fär de Boom ä Luschtbliehe, weil er weest, dassa ball in de Himmel kummt. Soi gonzes Leewe issa in de Himmel gewachse und hodd soi Lied in de Wind gsunge. Korz vorm Dood duud er sisch nochämool luschtvoll fortplonze. Er find soi Ruh un mi'm Nachwuchs solle sisch onnare rumache. Insofern is die Fortpflanzung aus Ongscht un/odda Luscht vernünftig. Kännsch määne, die Bääm hädde mehr im Kobb wie die Mensche.

Wonn Unnanähme märke, dassa hinnenunna falle, dreiwe se kä Ongscht- odda Luscht-Bliehde. Sie fusioniere mid onnare Unnanähme, erhöhe so ihr Gewischt un stärke zomme umso schnella ab. Odda sie wärf „Ballascht“ ab un schmeiße die naus, wo ne helfe kände, ihr qualifizierde Midarweida. So macht's aa menschlichi Zeidung. Seit Johre verliere Zeidunge Leser un Wärwekunde on's Internet un on de nadierliche Foind vom Lese, de Analphabetismus. Leser verliere, is fär ä Zeidung nadd so schlimm. De Zeidung isses egal, ob se gelese worre is, bevor se in de Papier-Container wandert. Awwa die Wärwekunde – ohne die geht's nadd. Jetz wärf Zeidunge „Ballascht“ ab - des is vor allem Qualität un Kompetenz. Moddo: s'geht uns erscht widda bessa, womma schleschda wärre. Verstehe

Sie des? Isch aa näädd. Beispiel: Viel Zeidunge verzischde uff professionelle Foddografe un losse Jeden knipse, wo mim Finger uff de Auslöser drigge kann. So sehe die Bilder donn aus. Do hebt äna ä kläni Digitalkamera, wo mit Blitz näädd weida wie vier Meda uffnämme kann, in ä zwonzisch Meda longi, dunkli Hall un driggt ab. Odda seschzisch Leit wärre uff ämme Foddoo 3,5 x 5,0 cm gezeigt usw. De Phondasie vun de ‚Barfuß-Fodografe‘ un ihre Redaktione sin do kä Grenze gsetzt.

Nadierlich könne Zeidunge uff die Art ihrn Unnagäng näädd verhinnare. Awwa es is ä nääi Kuschtform entschdonne: Unsichtbar machen durch Abbildung. Des is die greescht Revolution im Bereisch visuella Darstellung seit'm Cro-Magnon-Mensch vor guud dreißischdausend Johr. Die primidiefe Mensche hawwe domols Ebbes sischbar gemacht dursch Abbildung: Tiere, Mensche, Symbole. Un so hodd mas ghalde bis jetz. Womma was zeige wollt, hodd ma's abgebild. S'is de moderne Cro-Magnon-Mensche in Zeidungsredaktione vorbehalte gebliww, jetz den Schritt zu naie Ufer in de optische Gschdaldung zu mache: Unsichtbar machen durch Abbildung. Ä Foddoo als Rorschach-Test un de Text als Interpretationshilfe. Gell, do glotscht!

WOCHENBLATT Mannheim
06. August 2009

Poesie der Friedhöfe

Hans-Peter Schwöbel

Summzeit – do duu ma näädd bloß verreise, monschmol grigge ma aa selwa Bsuch. Un die Panik – was unnanemme mit de Leit! Nää, die Probläme hawwe mir näädd in de Kurpalz. Do gibt's so viel zu sehe, dass ma näädd weeiß, wo oofonge. Heidlbürg, Ladeburg, Bärgschdrooß, Woischdrooß, Speyer, Worms, Däärk, Naistadt, Schwetzinge, Schriese, Woinem. Odewald, Kraischgau, Haardt, Nordpälza Bärglond. Wonn unsan Bsuch widda geht, hamma kä Värddl vun dem gschafft, was ma mache wolde.

Allää Monnem: Schloss, Wassaturm (vorher gugge, dass er näädd verpinkt un verschmiert is!), Luise- un Herzogriedpark, Planetarium, Landesmuseum fär Arweid un Teschnik, Reiss-Engelhorn-Muse'e. Fehlt was? S'meischde fehlt! S'gibt so viel zu sehe, dass ä Kolumne näädd longt, um's uffzuzehle. Wie wär's, wonn's

in www.mannheim.de ä Seit gääb, wo ma soi schännschde Plätz in Monnem un de Kurpalz vorstelle kann? Än Reisefiehrer vun de Leit, wo do leewe.

Zu moine Lieblingsplätz gheere die Friedhöf. Isch denk z. B. on die Friedhöf in Keffadaal un Feidene, on de Waldfriedhof in de Gaddestadt, on de Jüdische Friedhof beim Hauptfriedhof, on die Friedhöf in Neggaraa, Seggene un on den uff de Rhoinau/Pingschtbärg. Un on de schännschde un greeschde: de Hauptfriedhof. Dort komma schbaziere gehe, sisch hiehogge un gugge. Un horsche. Un de Duft-Balsam vun Blumme un Bääm uffsaue. Die Vielfalt vun Bääm, is greeßa, wie in jedem Wald. Des selwe gilt fär die Vogglarte. Isch kenn kån Park mit so poedische Lisch- und Schaddebeziehung, plätschernde Brunne, Öffnunge un Verdischung. Un s' Lied vum Wind. In jedem Boom un Strauch singt er onnascht. Die Grabschdää vazehle die Gschischt vun de Mensche un de Stadt. Unna onnarem deswege bin isch gege anonyme Beschdaddunge. Isch glaab, mir hawwe näädd s'Rescht, uns spurlos devuu zu mache.

Jetzt gibt's uffm Hauptfriedhof ä Oolaag, näädd weit vum Hauptoigong: S'Parkgrabfeld – ä Aacheweid. Do sieht ma, Friedhöf sin fär die Leewende doo. S'Grab is die Wiege der Menschheit, saache die Evolutionsforscher. Die Leewewe, wo ihr Doode näädd hawwe liegge losse, sondern begrawe un die Grewa gschitzt, gschmickt un gepflegt hawwe, ware die erschde Mensche. In Monnem is de Wirklichkeit dodezu ä poedische Pointe oigfalle: De naie Chef vum Friedhof samt heeßt Adam - de erschde Mensch.

Die schääne Parklondschaften falle näädd vum Himmel. S'braucht Liewe, Kunscht un Arweid, se zu gschalde un zu erhalte. Dofier ä Donkschää on die Gärtner un Friedhofspfleger. Isch saach's imma widda: die sin die wohre Ökonome, weil se Ressource pflege un Werte schaffe! Wie Lehrer un Erzieherinne, wo gugge, dass aus de Kinna was wärrd.

WOCHENBLATT Mannheim
23. Juli 2009

Change-im-Quadrat
Hans-Peter Schwöbel

Monnem-im-Quadrat. Change-im-Quadrat. Sie wisse's doch: Der Zweek'er hinne owwe iwwa Monnem un hinne owwe iwwa Change is kä Numma, des is ä Potenz. Mannheim-im-Quadrat spielt uff die Quadrade oo un heeßt gleichzeitisch: Monnem is potent, is arg stark. Un Change-hoch-zwee? Des is ä Potenzmiddl fär Monnem un die Metropol-Region. Jetz scheniere Se sisch doch näd! S'is ä geischdisches Potenzmiddl, wie's Mensche schun imma oisetze.

Change-im-Quadrat hodd siwwe Ziele fär Monnem gsetzt. Isch finn se klasse. Die kann jeda unnaschditzte, wo Monnem un de Kurpalz guud duu will. Isch iwwa draach die Ziele mol ins Monnemarische:

1. Monnem weist mit ännare ökologisch un sozial oriendierde Urbanität (Stadtkultur) die Vordeile vun ännare Metropole (= Zentrum, Hauptstadt!) uff, ohne den gonze Krätz, unna dem monschi Mega-Ciddy schier vaschdiggt.
2. Monnem is Hoimat fär Begabung un Bildung un lockt so imma mehr gscheide Leit in die Stadt. (Des wisse ma näd erscht seit geschdern: Begabung, Bildung, hoher kultureller Ooschbruch un uffreschder Gang sin die wischdigschde Grundlage fär Demokradie un hohi Leewensqualidäd.)
3. Monnem zieht Unnanähme, Erfinna un Grinda oo. (Wer weeß, vielleicht leewe die Benze-Carle, Lanze-Hoinrische, Draise-Carle, Schillers-Fritze un Franke-Ludwische vun hait schun in Monnem un misse bloß noch gfunne wärre...)
4. Monnem is Vorbild fär's Zommeleewe in Metropole. (Guud, dass ma näd onnare noochäffe, sondan selwa Vorbild soi wolle. Onnasch hawwe ma die Titl „Metropol-Region“ odda gar „Kulturhauptstadt“ näd vadiert. Wonn äna mäant, moderne Metropole känd ma sisch bloß dreggisch un als Slum vorschdelle, beweist, wie wäänisch Phondasie er hodd, un wie wäänisch er on uns Monnema glaabt. Mia solde näd vasuche, Klää-Berlin zu wärre, sondern Monnem-im-Quadrat = Monnem mit Potenz!)
5. Monnem is Vorbild fär Bildungsgereschdischkeit in Daitschlond. (Des hilft die onnare Ziele zu erreische.)

6. Monnem is on de Spitz vun dänne Schdädt, wo ä moderni Schdadtkuldur endwickle, un wo die Kreativwirtschaft (schöpferische Ökonomie!) än Hauptschwerpunkt bilde duud.
7. Die Monnema sin birgerschaftlich stark ongaschiert un wärre vun de Stadt schwer unnaschditzt. (Do därrf ma nädd bloß droo glaawe, des muss ma oifordern!)

Kombliment on die, wo des Leitbild formuliert hawwe! S'muss imma widda veröffentlicht wärre un viel driwwa geredd. Un mir misse unsan Alldaach droo messe. Jetz kummt's uff alle oo: uff de Owwabirgameeschda un de Gemoinderat, die Schdadtverwaltung, die Kinnagärte un Schule, die Käärsche, Veroine un Birgainiative, die Unnanähme un Gewärkschafte un uff jeden änzelve vun uns.

WOCHENBLATT Mannheim
09. Juli 2009

Summa-Duft

Hans-Peter Schwöbel

Nailisch haww isch als lwwaschrift iwwa mä Leserbrief gelese: „Der Duft des Sommers“. Hea, haww isch gedenkt, die Poesie is häämkomme zu uns Daitsche, s'Volk der Dichter und Denker is nädd verlore. Wonn schun Leserbriefe poetisch verfasst wärre, hamma Grund zum Juuwle: Juhuuu! Vergesst die Finonz- un Wirtschaftskris. Die Daitsche sin ä Kuldurvolk, des is wischdischa, wie alles onnare. Un mir war klar, jetz kummt ä Hymne uff de zarte Duft vun Rose, vun Linde, vum Jasmin, un die Vorfreed uff de Duft vum Summaflieder.

Awwa was än Schock! S'stellt sisch raus, der Schreiwler mäant mit ‚Duft des Sommers‘ de Gschdonk vun Brondbeschleunischa, schlescht vabrennda Holzkohle un noch schleschda vabrenndem Fett un is biddabees, dass die Stadt Monnem des Grille om Rhoi verbodde hodd. Dass die karzinogene Wirkunge, wo vun ääm gegrillde Steak ausgehe, uugfähr 500 Zigaredde entspricht, wärrd gern akzeptiert – aa vun Familie mit Kinna. Härrlich, wonn Kinna im digge Induschdrie-Smog als ‚Duft des Sommers‘ sozialisiert wärre. Nä, des mit dem Induschdrie-Smog nemm isch zurigg. Ä Fabrik, mit dem Ausstoß on Schadstoffe, wie's die Griller om Rhoi fär ihr guudes Rescht halte, wär schun long zugemacht worre.

Wie's de Nadur geht un de Leit, wo om Rhoi wohne, un om Wocheend nädd wisse, wo hie un naus, vor Dreck, Gschdonk un Rabbatz is uuwischdisch. Dass dodebei mehr Foischdaab un onnares Gift in die Luft gelosse wärrd, wie in sämtliche Umweltzone oigspart wärrde konn, is nädd schlimm. Des is jo grad „der Duft des Sommers“. Des Credo vun de Spaß-Fundamentaliste: „Ich grille, wo ich will!“ „Ich pinkle, wo ich will!“ „Ich rauche, wo ich will!“ „Ich saufe, wo ich will!“ „Isch schmeiß moin geischdische un physische Dreck hie, wo isch will!“

Wer sich de Spaß-Fundamentaliste nädd beugt, den trifft der Bannstrahl: Spießler!! Do saach isch: Wonn die Lieb zur Nadur un zu Monnem, wonn die Frooch, was moi Verhalde fär Folge fär Onnare hodd, wonn die Vorstellung, dass de ökologische Umbau vun de Induschdriegsellschaft bloß mit sonfte Forme vun Naherholung zommegeht – wonn des alles spießisch is, donn bin isch än Spießler! Wonn äna, wo droo glaabt, dass ma sich free'e, un än mords Spaß hawwe konn, ohne soi Mitmensch niederkrawalle, im Smog zu verschdigge un Dreck vakumme zu losse – wonn des än Spießler is, donn bin isch äna un will äna soi!

Dasses onnaschd geht, hawwe de Gerhard Fontagnier un de Wolfgang Raufelder mit ihre Leit beim Griene Karlsternlauf bewiese. Do hawwe 800 Mensche än dolle Sundaach erlebt mit Sport, Nadur un schääne Begegnunge, ohne dass de Wald ooschließend aussehe hodd wie än Dreckääma. Bravo!

WOCHENBLATT Mannheim
25. Juni 2009

Kulturhauptstadt... **Hans-Peter Schwöbel**

Uulängscht is om Wassatum ä Fraa uff misch zu kumme, hodd sich vorgstellt als Frau Reinhardt aus de Seggema Schdrooß, un gsacht: „Gehe Se mol mit, isch zeig Ihne was.“ Do simma uff die Balustrade, wo ma den dolle Blick hodd in die Blonke, in die Auguschda-Oolaag un uff de Friedrichsplatz. S'gibt in Monnem kaum ä Panorama, wo so schää is, wie vun de Balustrade um de Wassatum. Awwa, was än Schock! Alles verpisst, verschisse, verkotzt! Des Gonze garniert mit Fast-Food-Abfall un Schmierereie, uff Daitsch, Idaliänisch un Tirkisch.

Des sin Aggressionen gegen Monnem un gegen jeden Gast von uns. Für Teilnahme von Kongressen im Rosegarde ist der Wasserturm oft s'Änzische, was sie von Monnem sehen. Was könnte die Impressionen mit hämmen nenne, wenn das nadd so versaut wäre!

Dezu basst: Die Stadt als Aschebescha, Dreck-Ääma un Hundekloo. Wie isch nooch'm Uffdridd beim Stadtfest uff de Schatzkistl-Biehn vor dem goldischen Publikum zum Audo zurückkumme bin, hodd en Hund die Ausfahrt vom Parkplatz zugekackt ghabt. Un on viele Stelle ligge hunnade von Kibbe uffm Quadratmeda. Hinna so Leit kann ä Kommune nadd ewisch herbutze. Dänne muss ma de Kimmel schloime. „Man möge sich dem Bauwerk nach den Regeln des bürgerlichen Zusammenlebens und mit Würde nähern“, heißt's in Prag omme Haus. Gilt des in Monnem nadd?

Dezu basst: Kürzlich hodd en Monnema Komödiant in de Aräna soim Publikum Zote un ronzische Witz vor die Fieß geschitt. Die Zuschauer hawwe sich mit Ovationen bedonkt. Warum macht en Komiker so was? Die Antwort gibt sein Vadda: „Warum nadd, solong Geld mit vadientscht...“? Des Menetekel steht nadd bloß iwwa dem ‚Event‘ in de Aräna, sondan aa iwwa de Finanz- un Wirtschaftskrise, wo in Wirklichkeit ä Kulturkrise is.

Die Wasserturm-Vandale un die, wo die Stadt zusaue, nenne die Arme-Leute-Variante von dem armselischen Satz für sich in Oosbruch: „Warum nadd, so long's nix koscht!“ Wenn dann noch die dritt Parol dezu kummt, hammas Elend von unsara Epoche uff de Punkt gebrocht: „Warum nadd, s'mache doch alle...“ Dezu basst: die miseraw! Wahlbeteiligung.

Kulturhauptstadt Mannheim? Do saach isch mim Xavier: „Dieser Weg wird kein leichter sein...“. Awwa mir kenne's schaffe. Im Zentrum von demokratischer Kultur steht die Würde des Menschen. Wissenschaft, Kunst, Politik, Pädagogik, Wirtschaft un Alltagsverhalte legitimieren sich im Hinblick uff des Zentrum. Nur was die Würde des Menschen stärkt, is legitim. Is so ä Kultur nadd steril? Iwwhaupt nadd! Es is doch alles erlaubt: filigran un defdisch, erotisch un provokativ. Bloß ääns bitte nadd: dabbisch. Die Achtung vor änonna un vor der Stadt, in der ma lewe, is die wischdigschd Grundlag für ä Kulturhauptstadt in Europa.

Die Hu-Hu-Macher

Hans-Peter Schwöbel

Dieser Daache bin isch in Monnem rumgeloffe un habb on nix Bees gedenkt. Uff ämol fährt än Klääbus omma vorbei mit zwonzisch Leit drin. Die hawwe on die Scheiwe gdrummelt, gewunke un Hu-Hu gerufe. Isch habb hinna misch geguggt, weil isch gemäänt habb, do stehe noch ä paar hunnad Leit. Nix, isch war mudda-seeleallää. Grad wollt isch misch ä bissl in die Bruscht schmeiße: Ouh, Schweewl, longsom wersch beriehm: ganze Klääbusladunge voll Leit mache fär disch allää Hu-Hu. Donn haww isch awwa gsehe, des sin jo Bolidigger als Bürger verkleid im Wahlkompf. Sie, im Wahlkompf kenne die uff ämol Jeden. Do kenne die nix, do kenne die keine Verwondte, do kenne die Jeden. Brave Zwische-, Hinna- un Unnabänkler verwondeln sich im Wahlkompf in wilde, reißende Hu-Hu-Macher.

Isch war froh, dass wenigchdens de Fahrer die Nerve behalde hodd un weidagfahre is. Schunsch wäre die ausm Bus gstärzt, hädde misch uffm Droddwar iwwa de Haufe gerennt, sisch mime Fässl Freibier uff moi Bruscht g'hockt un misch als Ihrn persönliche Wähler schdundelong abgeknutscht. In moinare Ongscht hab isch zurückgeguggt, wie wonn isch se wähle deed. S'war so ä Art finales Redungsläscheln.

In de Deggung vun parkende Audos bin isch donn neewa dem Bus hergerennt. Isch wollt sehe, was do abgeht. Ämol hodd de Bus donn doch ghalde. Die Wahlkämpfer sin raus un ännare Katz nooch bis nuff in de Loggekopp vun ännare zwonzisch Meda hohe Kiefer un hawwe vasucht, därre Katz s'Wahlprogramm un ihr Audogramm in die Pfood zu drigge. Was hodd die Katz gfaucht! Donn is noch ännä ausm Bus kumme mimme Frack oo. Des war de Fracktions-Chef. Er hodd nuffgerufe, dass Katze in Daitschlond näd wahlbereschdischt sin. Sie, die ware gededscht! Sin Se schunnemol longsom ä Kiefer widda runna gerutscht?

Denooch hab isch noch ä paarmool die Begegnung vun Bollidigger mit ihm geliebte Wahlvolk beobachte künne un gseh, dass ma ä Typologie vun Wahlkämpfer erkenne kann. Die, uff sichere Blätz grieße gnädisch vun owwe runna, die uff aussichtslose Blätz grieße mit hängende Ohre. Un uff dänne Blätz, wo nadd klar is, ob's noch longt, hogge die Hu-hu-Macher, läschln disch in Grund un Bodde un mache Hu-Hu...

Raffiniert die Wahl-Plakate. Ziel is offenbar, de Uubekanntheitsgrad vun de Kandidade noch zu steigern. Die Nome konnsch oft nadd lese. Un die Portraits sin mim Computer so faldelos ‚gstylt‘, so aufgehübscht, dass nadd weesch, issas odda isses so in Sohn.

Monsche Bolliddiga saache, Sie dreffe bloß Sachentscheidunge. Isch mään, doo künnt ma doch in ännare Art Persänlichkeitswahl die Sache selwa wähle. Weil, die Sache wärre jo om beschde wisse, was guud fär se is, odda?

Solle ma om 7. Juni wähle geh? Uff jeden Fall, grad jetz, wo ma seschzisch Johr Grundgesetz feiare! Mir darrfe un misse wähle! Die Kommunalwahle un die Europawahle sin bsonders wischdisch. Wer määt, Wahle helfe nix, soll sich Lända ogugge, wo nädde gewählt wärre darrf. Awwa ma misse als Bürger aa unnam Johr s'Maul uffmache, un de Bolidigger saache, was ma wolle un was ma nadd wolle. Mir misse uns oimische!

WOCHENBLATT Mannheim
28. Mai 2009

Keine Panik!!!

Hans-Peter Schwöbel

Versuche Se mol, absichtsvoll on Ebbes nadd zu denke, z. B. on än Schobbe Woi, indem Se sich konzentriere un vor sich hie saache: „Bloß nadd on än Schobbe Woi denke. Uff kün Fall on än Schobbe denke! Isch denk jetz nadd on än Schobbe...“ Märke Se was? Des geht nadd. Ma kann nadd absichtsvoll on Ebbes nadd denke. Je mehr Se den Gedonke on de Schobbe loswärre wolle, umso mehr ergreift er Besitz vun Ihne. Wonn Se vor Publikum was vordraache misse un sich druff konzentriere, onare bestimmte Stell nadd hänge zu bleiwe, bleiwe Se genau dort hänge. Des hodd damit zu du, dass ma unsam Härren (Hirn) was oidrischdern kann, awwa

nädd ausdrischdern. Die bescht Meeglichkeit, Ebbes zu vagesse is, gar nädd droo zu denke.

Gfiehle un Gedonke, vor dänne lauthals gewarnt wärrd, vaschwinde nädd, sondan entstehe erscht dursch die Warnung. Kärzlich hawwe ä paar Leit gsacht, wonn die Wirtschaftskrise so weidageht, kännt sogar de Daitsche mol de Kraache blatze. Isch finn, des is än legitimer un verninfdischer Hieweis vun Mensche, wo de Glaawe on die Daitsche noch nädd gonz verlore hawwe. Zur Würde gheert aa, sisch nädd alles gfalle zu losse. Awwa glei hawwe sisch gonze Rudel vun uffgeregde Beruischer vor die Kameron un Mikrofone gschmisse un vor „unnötiger Panik, vorschneller Panik, übereilter Panik...“ gewarnt.

Des selwe bei de Saugripp (hochdaitsch: Schweinegrippe): „Keine Panik!!! Keine Panik!!!“ „Keine Panik angebracht“ hodd aa Ihr Lieblingswochezeitung getitelt. Isch versuch verzweifelt, ma vorzustelle, wie ä needischi Panik, ä reschtzeitdischi odda ä oogebrochdi Panik aussieht. Do frooch isch misch: Merke die nädd, dass Se genau so Panik erzeuge, odda hawwe Se's druff oogelegt, die Leit in Panik zu versetze? Im Hieblick uff die Schweinegrippe saach isch: Sehr geehrte Damen und Herren Lobbyisten der Fama-Industrie. Wenn Sie im Frühjahr Ihre Lagerbestände an Fama-Produkten räumen wollen und Ihre Aktien steigen sollen, dann machen Sie doch jedes Jahr einen Winterschlussverkauf für Fama-Produkte. Bewerben Sie Ihre Bestände als ‚Schnäppchen‘. Das wirkt sicher und würde der ganzen Welt die Inszenierungen von Panik durch Warnungen vor Panik ersparen.

Moi Prognos fär 2009: Bis es Johr rum is, wärre widda zähdausend mol mehr Mensche on de Kibbe schdärwe, wie an der Schweinegrippe. Do misst's im Fernseh un Radio mol Sondersendunge gewwe un Beilage in de Zeidunge, wo die ‚Hotspots‘ vun de Kibbe-Pandemie gezeigt wärre un wie ma sisch schitze kann. Monnem is so än ‚Hotspot‘. Uulängscht hamma widda erfahre känne: „In keiner anderen Stadt im Südwesten sterben so viele Menschen an Lungenkrebs wie in Mannheim.“

WOCHENBLATT Mannheim
14. Mai 2009

Silwerner Sau-Bär
Hans-Peter Schwöbel

De gonze Winder free'e ma uns wie Schneekäänisch uff die Butzwoch im Friejohr. Jetz is widda uffgeroomt worre in de Kurpalz! Ä Zeidung schreibt: „Die Zahlen der letzten Jahre lassen sich sehen: Bis zu 27 Tonnen Müll sammelten Schulklassen, Kindergartengruppen, Jugendhäuser und Vereine während der Reinigungswochen. Auch in diesem Jahr hoffen die Verantwortlichen aus Politik und Verwaltung auf einen großen Erfolg der Gemeinschaftsaktion. ... Das Motto heißt „Putz' Deine Stadt ,raus!“, und die ganze Aktion ist als eine Art Wettbewerb der Stadtteile und der Abfall-Sammlergruppen aufgezoogen. Jeweils die drei besten Teams in den Kategorien Stadtteil, Verein, Schule und Kindertagesstätte gewinnen Geldpreise zwischen 200 und 500 Euro...“

Frieher war's Zentrum vun de Gemoinde de Marktplatz mit Käärsch un Wätschaftde. Des magische Dreieck Marktplatz, Käärsch un Wätschaft war s'Glaubens- un Kulturzentrum vun Dorf un Stadt. S'Diesseits un s'Jänseits eng umschlunge. Während die Momme sunndaachs fromme Lieder un Gebede zum Himmel gschiggt hodd, hodd ä paar Meda weida de Babbe mit ä paar onnare Schloode die Hond ums Schobbeglas gelegt un s'Diesseits gfeiert.

Späda sin Schloode vun Fabrike un Biros dezukumme un hawwe die alde Wohrzeische in de Schadde gschdellt. Inzwische simma, Godd sei Donk, noch weida säkularisiert un lewe in de Wegwerfgesellschaft. Därre ihr Seel is nädd s'Dreieck Kärsch, Marktplatz, Wätschaft, sondern de Abfall. Mir vergemoinschafte uns nädd bei Schobbe un Gebet, sondern bei de Butzwoch. S'Zendrum vun unsam Glaawe: Waxdumm un Wettbewerb, wie bei de Seefebloose-Produzende in de Finanzwirtschaft: Wäänisch is schlescht un Viel is guud, egal, was drin is, in de Dudd! Nädd auszudenke, wonn die Butzer in de Roinischungswoche neggschd Johr wäänischa Dreck finne, wie des Johr. Die Leit deede vum Abfall-Glaawe abfalle. Abfall als Saatgut in de Schdrooße un om Fahrbohnronnd sin Indikadore fär Waxdumm. Deswege däärfe ma nädd bloß die ehre, wo Dreck oisomme, sondern vor allem die, wo den Dreck mache. Vorschlaach: Mir lowe fär die, wo de meischde Dreck hieschmeiße, än Preis aus: de Silwerne Saubär.

Bidderer Schbass beiseit: Iwwa zähdausend Freiwillische hawwe in Monnem uffgeroomt. Bravo! Beispiel: Mitglieder vun de Ghana-Union MA-LU (alles Nischtraucher!)

hawwe fuchzäh Sack Kibbe uffgelese. Bravo! Bloß: Womma Mensche Onnare ihrn Dreck ufflese lässt, ohne gleichzeitisch de Dreckfinke die Brems zu ziehe, wärre Hilfsbereitschaft un Gemoinschftsgeischt missbraucht. Erscht wonn Hingabe un Fleiss vabunne wärre mit'm Mut, anti-soziales Verhalde zu unnabinne, entsteht Sege fär die Gemoinschaft.

WOCHENBLATT Mannheim
30. April 2009

Donau, so grau... **Hans-Peter Schwöbel**

...so grau, so grau... Mache Se's doch grad ämol: De Kischedisch uff die Seit un mol widda zu Ihrn Schatz gsacht: „Du bisch moi Härzkärsch!“ Sie schbitze die Libbe, peife de Donauwalza un donze: Donau, so grau, so grau, so grau... Uff ämol bleiwe Sie stehe wie oogeworzelt. Ihr Härzkärsch donzt allää weida un umschwebt Sie als Mond aus Granat. Sie denke: Des stimmt doch näd. Beim Johann Strauß heeßt's näd „so grau...“, s'heeßt doch „so blau...“. Rischdisch, des gibt ä Guts! (1850 schrieb Carl Beck ein Gedicht mit dem Titel "An der schönen blauen Donau", das mit der Zeile "Donau so blau, so blau" endet. Johann Strauß, nahm den Titel dieses Gedichtes als Titel für den 1867 komponierten Donauwalzer.) Wo hr is: Die Donau is näd bloo. Sie is mol ä bissl braun, ä bissl grie, awwa fascht iwwaral groo.

Mir ware 180 Passagiere uff de A-Rosa Mia vun Passau noch Budapest un zurigg. Ä Schiff volla Kur-Pälza – lauda goldische Leit! Mir hawwe mit unsare eigene Aache un de Aache vun Onnare gsehe: groo is die Donau. Guud so! Unna mä blooe Himmel, wo ma lautlos zwische griene Wälda un Wingart durschgedraache wärrd, wie uff Fliegende Debbisch, basst die Farb Groo guud. Aa die Oihoimische hawwe gsacht, die Donau war nie bloo. Die hawwe sogar gemäänt, de Johann Strauß war bloo, wie er den Walza gschriwwe hodd. Mir Kurpälza hawwe sofort Vaschdändnis ghabt, uns mitm Johann Strauß solidarisiert un Woi aus de Palz un Marilleschnaps aus de Wachau gepetzt, bis ma aa uff blooe un aroschene (orangen) Wolke ghoggt sin.

Schää war's, arg schää! Die Donau is än härrlischa Strom. Mit 2888 km isse mehr wie dobbt so long, wie de Rhoi (1320 km). Un die Donau is ä Fraa. Was kann die mit de Hifte schwinge! Des schbiersch sogar ohne Marilleschnaps un Pälza Woi. Om Ufer: Bäрге un Ewene, Wingat un Därfelscha – wie gemoolt. Wien, Budapest, Bratis-

lava – jedi Stadt ä Juwel. Mein schönstes Ferienerlebnis? Ä 40-km-Radtour mit'm Milan un'm Gerhard zwische Wingart un Marillebääm dursch die Wachau vun Krems bis zum Stift Melk.

S'Personal uffm Schiff is freundlich un kann was. Die Kabine ware sauwa un gemietlich. S'änzisch Schleschde on Bord war's guude Esse. De Schbiggl in moinare Kabin is jeden Daach schmärer worre. Dofier hodd sisch än persänlicher Reddungsring um moin Bauch gelegt – dass jo nix bassiert.

Die SÜWE-Verlage hawwe die Donaukreizfahrt exklusiv ihre Leser oogeboode. Organisiert worre isse vun 14 TUI Reise-Center in de gonz Kurpalz. Großes Kompliment: Alles war klasse un perfekt organisiert. Isch mään, s'Wocheblatt kännt so was widda oobiede. Neggsch Johr vielleicht uff de Rhône? Wer doch klor, odda?

WOCHENBLATT Mannheim
16. April 2009

Weiße schwarze Katze **Hans-Peter Schwöbel**

Stelle Se sisch vor, jemond hodd ä schwarzi Katz uffm Arm un schreit imma widda: „Wonn isch's Ihne saach, die Katz is nadd weiß. Wie kumme Se druff, dass die weiß wär. Die Katz is schwarz!“ Sie denke, isch habb doch gar nadd gsacht, dass die Katz weiß is. Sie gugge sisch rum: vielleicht hodd jemond onnasch behaupt, die Katz wär weiß? Awwa Sie sehe bloß Frochezeische in de Aache. Alle sin uusischer, ob sie nadd gonz kloor im Kobb sin, odda der mit de Katz.

Sisich gege Behauptunge wehre, wo kän Mensch uffgestellt hodd, is ä perfidi Art, Verwirrung zu stifde. So war's widda noch'm Massagga vun Winnenden. Gleis sin Waffenlobbyischde un Gewalt-Video-Spieler un ihr Dealer on die Mikrofone un hawwe gsacht: „Nicht alle Waffenbesitzer sind Amokläufer!“ un „Nicht alle Gewalt-Video-Spieler laufen Amok! Keine Vorverurteilungen!“ Warum wehre sisich Leit gege Vorwurf, wo niemond gemacht hodd? Im Fall vum Amoklauf isses klar. Ma wehrt sisich gege falsche These, die känna uffgestellt hodd, dass rischdische Oisichde nadd zu Wort un zu Geheer kumme. Rischdische Froche un Onworte solle im Getümmel un-nagehe.

Rischdisch is: Nädd alle Waffebesitzer sin Amokläufer. Awwa alle Amokläufer sin Waffenbesitzer oder extrem leischt on die Waffe kumme. Rischdisch is, was ä Eldernvertreterin vun ännare Nochbarschul in Winnenden gsacht hodd: „Was immer der Täter für Persönlichkeitsstörungen gehabt hat. Es wäre nie zum diesem Massaker gekommen, wenn er nicht an die Waffen gelangt wäre.“

Rischdisch is: Nädd alle Gewalt-Video-Spieler laafe Amok. Awwa alle Amokläufer hawwe sich monadelong, johrelong den Dreck noigezooche un ihr beleidischdes Ego mit Hondlungsmuschda uffgelaade, wo onnemä verfluchde Daach fascht vun selwa exblodiere. Do brauch bloß wo onnasch noch so än Honnebombl soi Allmachtsphondasie'e los zu losse, wie ä Rudel dollwidischer Hunde, donn wärrd de näggschde bewaffnede, in Selbschtmitleid versoffene, mitleidlose Schwäschling akut gefährlich.

Ma därrfe nädd zulosse, dass gud erkennbare Zommehäng vernewwlt wärre. Des Verbresche vun Winnenden is nädd auszuhalde. Awwa kabiere, was abgonge is, könne ma. Rohheit un Bosheit sin ohne Geheimnis. Täterprofil: männlich, schwach, Zugang zu Waffe, Gewalt-Video-Spieler, driefend vor Selbschtmitleid, krasse Reife-defizide. Mir hawwe uns on die Infantilisierung (nädd bloß bei Jugendlische!) dursch Medie un Märkte, dursch Wärwung un Unnahaldung, dursch Nädd-Gebraucht-Wärre un kä Verondwordung drache misse/därrfe schun so gewähnt, dass ma gar nimma merke, wonn än Siebzähjährischer sich un die Welt in än raweschwarze Daachdroom dunkt, wie ä gläänes, zornisches Kind.

WOCHENBLATT Mannheim
02. April 2009

Milliarde **Hans-Peter Schwöbel**

Milliarde. Was isn des? Ä Word? Ä Zahl? Isch glaab, des is ä Zahl als Word, dass mas redde könne, ohne uns Knibbl in die Zung zu babble. Stelle Se sich vor, ma misste jeden Nulla extra betone. Ma könne fünfhunnad Milliarde saache, ohne zu ahne, was des heeße soll. Odda könne Sie sich z. B. fünfhunnad Milliarde Schobbe vorschdelle? Des is so ähnlich wie mit därre Zahl: 3,14159 26535 89793 23846 26433 83279 50288 41971 69399 37510 58209 74944 59230 78164 06286 20899 86280 34825 34211 70679... Die heert om End gar nädd uff. Ma deede uns die

Gosch fronzlich babble un beim Zuheere Blummekohlore hole, womma fär die Zahl kä Word hädde. Wonn Se's wisse, gibt's Guts! womma uns sehe. Än Tipp: die Zahl wärrd jedes Johr om 14. März gfeiert. Om Geborzzdaach vum Albert Einstein!

Milliarde. Milliarde. Milliarde. Heere Se, was fär Geräusche die Wörda mache? Is des s'Poldern vun Geröllhalde aus Falschgeld un ubezahnde Reschnunge, wo imma noch uff uns zurase, noch dem Moddo: Wer Seifenblasen sät, wird Steinlawinen ernten. Mir peife im boomlose (baumlosen) Wald un hoffe, dass des Dunnan bloß vun leere Giederzieg (Güterzüge) uff de Riedbohn kummt.

Milliarde – des Wort haww isch in de letschte sechs Monat mehr ghert wie vorher in seschzisch Johr. Mit de Zeit gewähnt ma sisch droo. Die Inflation der Werte galoppiert mit der Inflation der Worte: Milliarde, Milliarde... Wonn monadelong Nochrischede heersch, wo mit hunnade vun Milliarde rumgfuchdeld wärrd un donn heeß't's, än Spitzelmanager deed, saache ma mol, bloß zäh Millione im Johr verdiene, denksch: Der arm Daifl!

Milliarde. Billione. Billiarde. Trillione. Isch hock im Monnema Planetarium immä Sessel un gugg des naie Programm oo: „Von Andromeda bis Zentaurus. Die Welt der Sternbilder.“ Des misse Se sehe un ihre Kinna un Enkl zeige. Nirgends in de Kurpalz komma de Sternehimml so gut beowachde, wie im Planetarium. Isch habb misch entschbonnt zurickgelähnt un gezehlt. Grad wie isch beim 70 000 000 000 000 000 000 013de Stern war, hodd de Chef vum Planetarium, Dr. Wacker, de gonze Himmel abgschalde. Isch geh grad nochemol in des Programm un du genau on därre Stell weidazehle, wo isch uffgehrt hab.

Isch muss de Dr. Wacker mol frooche, ob's schun imma so viel Stern gewwe hodd, odda ob die sisch aa erscht im letschde halwe Johr so vermehrt hawwe. Un ob alle escht sin, odda ob monsche bloß so due, wie wonn ses gewwe deed. Hawwe Sie gewisst, dasses Universum ä Ausdähnung vun bloß verzäh Milliarde Lischtjohre hodd? Verzäh Milliarde? Des is nix, verglische mit unsare Schulde. Mir wärrd Ongscht in dem glääne Universum. Isch grigg ä kosmogeni Klaustrophobie!

Auf der Roten Liste

Hans-Peter Schwöbel

Was ma seit Johre schbiere hamma jetz schriftlich. Om 21. Februar war widda „Welttag der Muttersprache“. Dodezu hodd die UNESCO (United Nations Educational, Scientific and Cultural Organization - Organisation der Vereinten Nationen für Erziehung, Wissenschaft und Kultur) än naie Weltatlas iwwa die Muddaschbrooche rausgebracht, wo schwäscher wärre, uffm Rickzug odda vorm Verlösche sin. In dem Atlas sin unna de bedroffene Regionalschbrooche in Daitschlond aa die Pälzische (zu dänne ghert aa Monnemarisch usw.) un onnare Rhoi-Fränkische Dialekte, wie's Hessische un's Lothringische. Uff ännare fünfschdufische Scala isses Pälzische uff die erscht kumme: „unsicher“. Donn geht's weida mit „gefährdet“, „ernsthaft gefährdet“, „definitiv gefährdet“ bis „definitiv erloschen“. S'gibt kää Grund zur Panik (fär Panik gibt's nie än gude Grund), awwa isch saach: uffbasse! Zumal sisch so Prozesse ab ämme beschdimnde Punkt beschleunische. Des sehe ma beim Ardeschdärwe un Klimawondel. Do hawwe die neggadieve Entwicklunge so zugelegt, dass Warner, wo noch vor zäh Jahr als Hysteriker färdisch gemacht worre sin, heit wie Verharmloser doo schdeh. Wo noch Subschoonz is, komma noch was mache. Womma mol in de Gfährdungsschdufe vier odda fünf sin, känna mas grad bleiwe losse.

Wie misst ma de Rickgong vun Dialekte? Wischdigschde Kriderie: 1. Die Schbrescher nämme in absolute Zahle ab. 2. Sie wärre in ihrer Gemoinde odda Region zu ännare Minderheit gegeniwwa dänne, wo die Schbrooch nimma känne. 3. Funktions- und Lewensbereische nämme zu, wo de Dialekt kä Roll mehr spielt. 4. Die Muddaschbrooch kann nimma odda bloß noch schwach on die neggscht Generation weidagewwe wärre.

Die Vielfalt is die Mudda vun de Kreadividäd, nädde die Einfalt un nädde die Monokultur. Wo Regionalschbrooche vaschwinde odda schwäscha wärre, verliert die gonz daitsch Schbrooch on Kraft un Fähischkeit, sisch zu behaupten un zu regenerieren. Dodebei kummt's nädde bloß un nädde in erschder Linie uff änzeln Wärdern oo. Wischdischa sin Melodie un Rhythme von ännare Schbrooch. Alles Sprechen ist ein Singen! Was sin unsa rhoi-fränkische Dialekte fär härrliche Gsäng! Die därfe genauso wänisch unnageh, wie die Lieder vun de Veggl. Unnasuchunge zeige, dasses Ähnlichkeide un Zommehäng gibt zwischem Schbrooche- un äm Ardeschdärwe. Mir känne un solle die Globalisierung nädde verhinnare. Awwa, ma misse de Entwicklung

vun Monokulturentgewirke: Esse, Schwätze, Musik, Wohne, Feiern usw. muss immer wieder aus seinen lokalen und regionalen Wurzeln geschärft werden. Ohne Hass auf andere. Die Freiheit der Eigene macht selbstbewusst und hilft, andere Traditionen zu achten.

WOCHENBLATT Mannheim
05. März 2009

Die Hände zum Himmel... **Hans-Peter Schwöbel**

Womöglich ehrlich sind: Anna von den wänschen großen Erfindern, wo kann Monnema war, ist der Charles Darwin. Carl Benz, Karl Drais, Karl Lanz – muss ich mehr sagen? Alles Monnema! Awwa der Charles Darwin ist kanna (am 12. Februar ist er 200 Jahre alt worden). Und der Alfred Russel Wallace (suchen Sie sich den Namen im Lexikon oder Internet) auch nicht. S'kannst du, dass die der Indonesische Archipel und die Galapagos-Inseln in- und ausländisch bekannt sind, awwa nicht gewusst haben, wo Monnema liegt. Obwohl sie auch bei uns Spottrosseln, Schluckspesche, Drecksperze, Schwatzfinke und Mutationen von Rindsbaitl hätte studieren können.

Jetzt sagen Sie, die zwei wären gar keine Erfindern, sondern Entdecker. Das ist wahr. Awwa das wissen erst mir, die mit der Gnade der späten Geburt. Der Wallace und der Darwin haben, jeder für sich, entdeckt, dass es die Evolution gibt als Entfaltungsvorgang von der Natur, und wir Menschen dazu gehören und aus demselben Dudda schlüpfen wie die Affen und die Hühner, die Geese und die Gänse.

Die Zeitgenossen von Darwin, haben gemäht, der hedd Wahnvorschdelunge und alles bloß erfunden. Sie haben sich tierisch aufgeregt, dass sie mit den Affen verwandt sind. Dabei: wenn sich jemand hätte aufrege misse, wäre's die Affen gewesen, dass sie mit uns verwandt sind. Warum haben sich Schimpansen, Orang Utans, Weisskopfmaki, Rotgesichtsmakake und Bartaffe nicht aufgeregt? Weil die damals schon ein Bildungsvorsprung vor uns gehabt haben. Für die war die Evolutionstheorie schon ein altes Hut, wie mir noch unser Brett vorm Korb für die Krone der Schöpfung galte haben.

Dabei haben die Menschen immerwährend, dass sie nicht bloß mit Affen verwandt sind, sondern z. B. auch mit den Winkerkrabben. Beweis: „Und dann die Hände zum Himmel,

komm lasst uns fröhlich sein, wir klatschen zusammen und keiner ist allein...“ (Die Kolibris). Mit dänne Veggl simma aa verwondt un sogar mi'm Tony Marshall, mi'm Hansi Hinterseer unnäm DJ Ötzi. Ja, die Evolution vollzieht sich nadd imma als Uffschdieg, monschmol aa als Niedergang.

Was oft iwwasehe wärrd: Die Entdeckunge vum Darwin un vum Wallace hawwe in änare Zunft än Super-Gau ausgeleest: bei de Kridiker un Spötter. Was sin die iwwa de Darwin hergfalle mit Karikadure un hawwe sich schlapp gelacht, noch dem Moddo: „Wie bleed...! Ach, Gott, sin mir gscheid, un is der bleed...“. Ma kann sich vorschdelle, was bassiert wär, wonn's domols schun die Fasnacht gewwe hädd un die Comedy.

Was könne ma draus lerne? Wer sich iwwa was schebb lacht, is nadd audomadisch im Rescht. Im Zweifl isses kän Fehler, womma vaschdeht, um wasses geht un s'Härm oischart, bevor ma sich kringelisch lacht.

WOCHENBLATT Mannheim
19. Februar 2009

Schwerst mehrfach normal **Hans-Peter Schwöbel**

Losse Se sich des mol uff de Zung verlaafe: Schwerst mehrfach normal. Die Wortschöpfung stammt vum Wolfgang Siemons. Der is ‚schwer mehrfach behindert‘ un griggt des oft genug gsacht. Siemons hodd des Selbstverschdändliche gege de Schdrisch gebärscht un de sogenonnte Normale de Schbiggl vorghalte. Des is brilliant un beweist hohi Intelligenz un Kreativität. Kompliment! Schwerst mehrfach normal – wem kummt do nadd's Grusln?

Normal soi is awwa doch was Gudes? Des is, wie bei Radio Eriwan: „Im Prinzip ja, aber...“ Rischdisch is, dass Individue, Gruppe un Völker uff so was wie Normalität oogewiese sin, uff Gewohnheide un Üblichkeide. Ohne schdabile Muschda im Alldaach, könne ma uns nadd oriendiere. Awwa: Gleichzeitisch is des Normale hoch gefährlich, womma ukridisch mit umgeht. Gonze Völker kumme sich noch normal vor, wonn se schun long in de Barbarei versackt sin. Die greeschde Dummheide un Verbresche wärre nadd vun Behinnade begonge, noch nadd ämol vun gewöhnliche Kriminelle – nää vun gonz normale Mensche. Wie Du un isch.

Sacht Ääna zum Onna: „Du muscht on de Börse schbeguliere, do konnsch än Haufe Geld verdiene, ohne än Finga krumm zu mache.“ Sacht de Onna: „Un des findsch Du gud?!“ Antwort: „S'mache doch alle!“ Die Sort ‚Normalität‘ draacht zu de Finonzkrisse mehr bei wie alles onnare. On de Börse un uff de Banke (vor un hinnam Schalder) hogge lauda gonz normale Leit.

Om 27. Januar war widda Auschwitz-Gedenkdaach. Des Johr war's Thäma die Verbresche, wo die Nazis on Behinnade begonge hawwe: Hunnaddausende sin zwongssterilisiert odda umgebracht worre. De Prof. Bauer vun de Universitätsmedizin Monnem, hodd im Ratssaal in N1 gezeigt, wie des in Monnem war. Ärtzt, Juriste un onnare hawwe nadd gezwunge wärre misse zu ihre Schondtate. Sie hawwe sisch denooch gedrängt, auszurodde, was'se in ihre hohle Köbb fär nadd normal ghalde hawwe. Sie ware ‚normal‘, domit im Rescht. Die onnare ware ‚anormal‘: Die Judde un die Sinti un Roma, die Kommunischde, Gerwerkschafder, Sozialdemokrade, die Behinnade un die Schwule. Un nadd zuletscht die Gscheide. Vor Leit mit Grips hawwe die schwerscht mehrfach Normale om meischde Ongscht.

Do muss isch widda on moin blinde Freund in Schriese, Fritz Hartmann sel. A., denke. Der war hochbegabt un hodd sisch vun ‚Normale‘, wo ihm geischdisch unna de Fingernaggl gebasst hädde, ‚Intelligenz-Tests‘ gfallte losse misse mit Frooche wie: „Was ist drei mal fünf?“ Korbmacher hodda wärre misse, statt Professor. Was hodd die dezu bereschdischt? Dasse gemäänt hawwe, sie wäre die normale Daitsche, Juriste, Ärtzt, Lehrer un Bolizischde: schwerst mehrfach normal.

WOCHENBLATT Mannheim
05. Februar 2009

Mir sin alle Barackler Hans-Peter Schwöbel

Fascht alle! Wie Letschjohr Präsidentschaftswahle in Ameriga ware, hodds gheeße, mir Daitsche deede zu 80 % de Barack Obama wehle – womma kände. Leider dährfe ma de amerigonische Präsident nadd wehle, obwohl soi Polidik mords Auswirgunge uff uns hodd. Immahin dährf uns de Ääne zum Hals raushänge un fär de Onnare dährfe ma schwärme. Äm Barack Obama hamma die Daume gedriggt. Mir sin Obamaiste, odda uff Monnemarisch, Barackler. Mir können jo quasi persänlich un dährfe

Barack un you zu äm saache. Vielleischt hodd unsa Daumedrigge doch ä bissl gholfe. Wonn än Schmeddalingsflug in China än Hurrikoon in de Karibik entfesseln kann (Schmetterlingseffekt), könne sisch Millione gedriggte Daume aa uff die Wahle in Ameriga auswirge. „Es gibt mehr Dinge zwischen Himmel und Erde, als eure Schulweisheit sich träumt“ (Shakespeare, Hamlet). Ewe! Dasses de Barack aa vaschdeht, wonna (wie imma) die Kolumne liest: „There are more things in heaven and earth, Horatio, than are dreamt of in your phantasy.“

Jetzt issa im Amt. In Ameriga un de gonz Welt gibt's inzwische so än Kuddlmuddl, dasses biblisch Wunna braucht, um do widda raus zu kumme. Ma brauche die Leidensfähigkeit vum Hiob un die Ufferschdehngkraft vum Lazarus. Allää schafft's de Barack näd. Deswege aktualisier isch de Schluss vum Kommunisdische Manifest: „Barackler aller Länder, vereinigt euch!“

Un schunnsch? De Negga war zugflore. Die Naggahaisa Fähr hodd ihm Betrieb oigsdellt ghabt. Isch bin als uff de Ladeburger Seit gschdonne un hab de Ente, Gäns un all dem Gfiggl zugeguggt, wie se gewetzt sin un uff de Schnawwl gfalle. Wonn long genug zuguggsch, deedsch de Donald Duck und de Unkl Dagobert erfinne, wonn's die näd schon gewwe deed. Isch habb gemärkt, wie die Veggl mit de Zeit lerne, besa mim Eis äänisch zu wärre. Sie bewege sisch vorsichdischa un wänischa. Wonn's geht, bleiwe se hogge, dass nix bassiert. So solde ma's als aa mache: z. B. londesweit Eisferie ausrufe. Alle bleiwe dehääm, außer die, wo lewenswischdische Uffgawe zu erfillen hawwe. Des deed unsara Lewensqualided mehr nitze, wie des Rumgehombel uff glatte Fahrbohne. Un: Klääne Veggl kumme mit dem Glatteis besa zurescht, wie große. Vielleischt kände ma uns ä Beispiel droo nemme. Imma greeßa heeßt näd imma besa.

Gern wär isch vun Ladeburg iwwa de zugflorene Negga noch Neggahause niwwagehoffe. Isch habb misch awwa näd getraut. Deswege haww isch Leit gfroocht, wo aa do gschdonne ware, ob se zäh Meda vor ma her laafe deede - als vertrauensbildende Maßnahme. Was soll isch Ihnen saache? Die hawwe sisch geweigert! Es gibt ää-fach kä Solidarität mehr unna de Mensche!

Ge-Denk-Johr 2009

Hans-Peter Schwöbel

Jetzt hammas ne widda gezeigt. Dänne do owwe. Odda do unne. Odda wo die sin: iwwa uns, unna uns, in uns? Wisse Se, wen isch mään? Die, wo letsch Johr Asche gezoosche hawwe, dass uns heit noch de Kiddl brennt. In de Silveschdanacht, hawwe mir klääne Leit awwa bewiese, dass mir aa Geld vabrenne känne bis de Qualm als dreggischa Lumbe iwwa uns hängt. Isch mescht wisse, wie long Kohlekraftwerke bloose misse, bisse so viel Kohlemonoxyd, Kohledioxyd un Foidreck abgedriggt hawwe, wie mir on Silveschda in de Himmel worxe, wie in ä großi Breschdudd. Nooch so ännare Krawall- und Schdink-Orgie erschoine äm die ‚Umweltzone‘ noch iwwaflissischa. Uff de ääne Seit: Grenzwerde im Mikrobereich, Messunge, Gebode un Verbode. Uff de onna Seit wuchde ma de Krach un de Dreck tonneweis in die Welt. Gern so, dass onnare den Dreck wegmache misse. Wonn än Außerirdischer uns zugugge deed, deeda uns sonft die Hond uff die Schdern lege un froche: „Geht’s noch?“

Nädd zu redde vun unsare Gschwister, de Tiere, wo sisch on Silveschda ins Hemm mache deede, wonn se äns oo hädde: Katze, Hunde, un Hase, awwa aa die in Feld, Wald un Flur. Die wisse doch nädd, warum die Welt uff ämol die Doobsucht griggt. Mir vaschdehes jo kaum. Warum mache mir den Rabbatz? Wolle ma uns ‚Asche aufs Haupt‘ schdreie? Odda beese Geischda vadreiwe? Des glaawe ma doch selwa nädd. Ma wisse, dass beese Geischda nädd in weiße Hemma dursch die Nacht fliege. Die hocke in uns: Unsa Ongscht, Herrschucht un Gier, unsa Gleichgildisckheit, Riggsichtslosisckheit, Feigheit, un Dummheit. Des sin die beese Geischda, wo die Welt uusischa mache. Die konnsch mit Bumm-Bumm nädd vadreiwe.

Ä Gsellschaft, wo bewusstsoinsmäßisch meileweit hinna sisch selwa herschlappt, kann ihr Probläme nädd leese. Der Oogriff uff die Welt on Silveschda is so iwwaflissisck wie än Kropp un so iwwaholt wie die Formel Ääns un onnare Raserie: Modernes Hinnawäldertum. „Mia mache des jo bloß wege de Kinna“, heer isch saache. Grad wege de Kinna, deed isch’s nädd mache. Die deede sisch aa vun onnare Rituale begeischdern losse. S’geht jo nädd drum, nix zu mache, sondern was Onnares, was mir un die Welt bessä verdraache. De Karl Marx hodd gsacht: „Das Sein bestimmt das Bewusstsein.“ Wonn des allää wohr wär, wäre ma wie die Hühner: Gack-

gack, gack-gack... Was kanna ma mache, dass der Marx-Satz onnasch rum aa stimmt? Rischdisch, denke! Womma 2009 nadd bloß gedenke (2000 Jahr Schlacht im Teutoburger Wald, 70 Jahr Oofong 2. Weltkrieg, 60 Jahr BRD, 20 Jahr Mauerfall) sondern denke, um-denke un-umhondle, donn kenne ma om End vum Jahr saache: „2009 war ein Jahr der guten Nachrichten.“

WOCHENBLATT Mannheim
08. Januar 2009